

### 六六、女人以香塗佛足生天緣

昔舍衛城中有一女人坐地磨香。值佛入城。女見佛身。生歡喜心。以所磨香塗佛腳上。其後命終。得生天中。身香遠聞。徹四千里。便往集於善法堂上。帝釋以偈而問言。

汝昔作何福 身出微妙香 生在於天中 光色如鎔金

天女即以偈答言

我以上妙香 供養最勝尊 得無等威德 生三十三天

而受大快樂 身出眾妙香 聞於百由旬 諸得聞香者

悉得大利益

即時天女向世尊所。佛為說法。得須陀洹道而還天上。諸比丘問言。昔作何福。得生天中。身若此香。佛言。由此天女。昔在人間。以香塗我足。以是因緣。命終生天。受此果報。